

## POBREZIA ENERGETIKOAREN KONTRAKO NEURRIEN INGURUKO KONTROL MOZIOA

Olaia Duarte Lopez EH BILDU udal taldeko zinegotziak, Udalbatzaren Organo Araudiko 98. artikulua oinarri, mozio hau aurkezten du Udalbatzan azter dadin. Mozioa 2016ko maiatzaren 16an Pertsonen Zerbitzuentzako batzordean aztertutako interpelazioaren ondorioa da.

### JUSTIFIKAZIOA

2015eko irailaren 22an, Udalbatzak Pobrezia Energetikoari aurrea hartzeko neurriei buruzko erakunde adierazpena onartu zuen. Haren arabera, Donostiako Udalak hitz eman zuen lan egingo zuela herritarrek oinarrizko etxeko hornigarriak -hala nola, argia, ura eta gasa- bermatuta izateko.

2015eko urriaren 19an, gure taldeak iradokizun bat aurkeztu zuen Pertsonen Zerbitzuetarako Batzordean; aurrekoaren betekizunari begira, aipatuko oinarrizko etxeko hornigaiak hornitzen dituzten enpresekin (Iberdrola, Naturgas eta abar) lankidetzaz hitzarmenak egitea proposatuz. Lan-hitzarmen hauen bidez ziurta daiteke gizarte-kalteberatasun egoeran dauden Donostiako familiei ez zaiela hornidura eten egingo. Uraren hornitzailea Udala izanik, hau berez beteko duelakoan, ez litzateke honelako ezeren beharrik izango.

Donostiatik gertu, badira pauso hau 2015ean eman zuten udalak eta administrazioak. Esate baterako, Bilboko Udalak 2015eko urrian sinatu zuen lan-hitzarmen bat Iberdrolarekin eta Nafarroako Gobernuak ere 2016aren hasieran beste bat sinatu zuen. Nafarroan, adibidez, lankidetzaz hitzarmena Nafarroan bizi diren eta prestazio ekonomiko bat jasotzen duten familiei aplikatzen zaie, aldeztu aurretik gizarte-zerbitzuek balorazio tekniko eta eskaera egin ondoren. Aste honetan bertan, Iruñeko Udalak publikoki adierazi du hiriko pobrezia-energetikoa zenbatekoa den jakiteko azterketa bat martxan jarriko duela, 2017ra diagnostiko integral bat edukitzeko eta, horren baitan, baliabideak sortzeko.

Kontuan izanda Donostiako Udalean eskatzen diren diru-laguntzen portzentajerik altuena etxebizitzarekin lotutako gastuak ordaintzeko erabiltzen dela eta, datuek diotenaren arabera<sup>1</sup>, Gipuzkoako pobrezia energetikoaren tasa etxebizitzaren % 7 dela eta Donostikoa %11.4koa, eta joera gorantz doala, presazkoa iruditzen zaigu Udal Gobernuak neurriak hartzea eta 2015eko irailaren 22ko Udalbatzan esandakoa betetzea.

Bere garaian EH Bildu udal taldeak egindako iradokizuna egokitzea hartu zuen zinegotzi ordezkariak, eta maiatzaren 31eko Gobernu Batzordean ikusi genuen, azkenean, Udalak lankidetzaz hitzarmen bat sinatu duela Iberdrolarekin. Hitzarmen horrek dio Iberdrolak hornidura-eteteak behar adina atzeratuko dituela, Udalak egiazta dezan ea egokia den pertsona edo familia baten zorra estaltzea, eta, hala egokitzuz gero, laguntza hori ordaintzea.

1 Gipuzkoako pobrezia eta bazterkeria egoeraren inguruko inkesta (2014).

Bestalde, ekaineko udalbatzan Irabazi Donostia taldeak aurkeztutako hurrengo kontrol-mozioa babestu zuen Udal Gobernuak: *Udal-gobernuak bidezkoak diren kudeaketak egin ditzala hirian gasaren eta argindarraren hornidura eskaintzen duten **konpainia guztiekin** hitzarmen bat sinatzeko, Iberdrolarekin izenpetutakoaren antzeko ezaugarriekin, horien ordainketari aurre egin ezin diezaioketen familiei energia hornidura moztu diezaietala eragozteko eta, bide batez, aipatutako hornidura horiek kontratatzen dituen konpainiaren arabera inor ez dadila diskriminatu bermatzeko.*

Uztaileko batzordeetan, zinegotzi ordezkariari gasa eta argindarraren hornidura eskaintzen duten konpainien negoziazioen berri galdetu genionean hurrengo erantzun zigan: *Iberdrola guregana etorri zen eta espero dugu beste enpresak gerturatzea, guk ez dugu inizatiba hartuko.*

Aitortu beharra daukagu erantzun honek harridura sortzen digula, batez ere Estrategia 2020 txostenean aipatzen diren datuei erreparatzen badiegu: 21.000 donostiarrek pobrezia-energetikoa pairatzen dute, 59.894 gipuzkoarrek arazoak dituzte etxean tenperatura egokia mantentzeko, 24.211 gipuzkoarrek beraien fakturak atzerapenaz ordaintzen dituzte zailtasun ekonomikoak direla eta, 94.522 gipuzkoarrek hezetasun arazoak dituzte, eta abar.

Azkeneko asteetan ere aho zabalik ikusi dugu Udal Gobernuak Iberdrolarekin egindako beste akordio bat: udal eraikinaren aurrealdea agiztatzea 200.000 euroren truke.

Talde honen ustez, horrelako adibideek agerian uzten dute zeintzuk diren Udal-gobernuaren lehentasunak.

Azaldutako egoera kontuan hartuta, behean sinatzen duen zinegotziak honako **MOZIO** hau aurkezten du:

1. Udalbatzak eskatzen dio Udal Gobernuari beharrezkoak diren baliabide eta hitzarmenak martxan jar ditzala donostiarren pobrezia-energetiko egoeren aurrean.
2. Udalbatzak eskatzen dio Udal Gobernuari hiriko elkarte zein eragileek beraien lokalen erabilerarengatik dituzten fakturak ordaintzeko izan ditzaketen arazoak azter ditzala eta laguntza mekanismoak martxan jar ditzala .

Donostian, 2016ko urriaren 21ean

Olaia Duarte López  
**EH Bildu udal taldeko zinegotzia**